



**ԹԵԴՈՒՏԻ ՊԱՇՏՊԱՆՈՒԹՅԱՆ ԶԱՂԱՔԱՑԻԱԿԱՆՍԱԽԱՁԵՆՈՒԹՅՈՒՆ
SAVE TEGHUTCIVIC INITIATIVE**

ՄԱՆԻՖԵՍՏ.

**ՀԱՆՈՒՆ ԺՈՂՈՎՐԴԻ ԻՆՔՆԻՇԻՎԱՆՈՒԹՅԱՆ, ՀՀ ՄԱՀՄԱՆԱԴՐՈՒԹՅԱՄԲ ԱՍՐԱԳՐՎԱԾ
ՄԱՐԴՈՒ ԻՐԱՎՈՒՆՔՆԵՐԻ ՊԱՇՏՊԱՆՈՒԹՅԱՆ, ԻՐԱՎՈՒՆՔԻ ԳԵՐԱԿԱՅՈՒԹՅԱՆ**

Թեղուտի պաշտպանության քաղաքացիական նախաձեռնությունը`

Առաջնորդվելով Հայաստանի Հանրապետության Սահմանադրությամբ ամրագրված սկզբունքներով` հանուն մարդու առողջ եւ արժանապատիվ կյանքի, սերունդների ազատության, ընդհանուր բարեկեցության և երջանիկ կյանքի,

Ընդունելով բնության պահպանությունը որպես ոչ ինքնանպատակ գործունեություն, այլ բնապահպանական իրավունքից, հանրային անվտանգության շահերից և մարդու իրավունքների պաշտպանությունից բխող անհրաժեշտություն,


Հավատարիմ մնալով Նախաձեռնության 22 փետրվարի 2012 թվականին ընդունված Կոչում տեղ գտած համամարդկային արժեքներին և սկզբունքներին,

Հասկանալով մեր երկրում տիրող համակարգային կոռուպցիայի, տնտեսության մենաշնորհային կառուցակարգի, ընդերքի բնական պաշարների անվերահսկելի գերշահագործման և դրանցից ստացվող եկամուտների անարդարացի բաշխման և արդարադատության համակարգի բացակայության պատճառները, որոնք հանգեցնում են սոցիալական անարդարության եւ զանգվածային արտագաղթի,

Անժխտելի համարելով, որ մարդը, նրա արժանապատվությունը, նրա հիմնական իրավունքները և ազատությունները բարձրագույն արժեքներ են, և, որպես բնության մաս, մարդը պետք է ապրի առողջ, բարեկեցիկ եւ ներդաշնակ շրջակա միջավայրում,

Գիտակցելով, որ իշխանությունը պատկանում է ժողովրդին, և, որ պետական ծառայողները պարտավոր են առաջնորդվել հանրային շահով և իրենց գործողությունների համար մինչև վերջ հաշվետու լինել հանրության առջև,

www.teghut.am, save@teghut.am

 Փրկենք Թեղուտը – Save Teghut (group)


Ինչպես նաև, **կարևորելով** քաղաքացիական սուլիդարությունը և փոխադարձ աջակցությունը, ինքնակազմակերպված քաղաքացիական դիմադրության տարբեր ոլորտներում պայքարող մարդկանց միջև՝

Իր անվերապահ վճռականությանն է հայտնում բոլոր գործողություններում հիմնվել մեր երկրի Սահմանադրությամբ ամրագրված իրավական արժեքային համակարգի վրա, առաջնորդվել քաղաքացիական հասարակության կայացման համար անհրաժեշտ՝ մարդու իրավունքների լիարժեք պաշտպանության սկզբունքներով, չընկրկել և հետ չկանգնել Հայաստանում սահմանադրականության հաստատման, իրավունքի և իրավական օրենքի գերակայության հիմնարար սկզբունքներից:

Որպես իր գործունեության արժեհամակարգային մոտեցումներ, Թեղուտի պաշտպանության քաղաքացիական նախաձեռնությունը որդեգրում է՝

1. **Բնությունը որպես** մարդու արտադրական և ստեղծագործական գործունեությանը զուգահեռ պահպանվող, դրան նպաստող և դրան չստորադասվող **արժեք**:
2. **Քաղաքացիական դիմադրության ոչ բռնի եղանակը՝** որպես Նախաձեռնության կողմից հռչակվող բացարձակ սկզբունք և գործելաոճ: Նախաձեռնությունն առաջնորդվում է այն անքակտելի գիտակցությամբ, որ կայուն և առաջադեմ քաղաքացիական հասարակության ձևավորման համար անհերքելի նախապայման է օրինականության, հանդուրժողականության վրա հիմնված քաղաքացիական գիտակցության և մշակույթի կերտումը.
3. **Պայքարի քաղաքացիական բնույթը՝** որպես Նախաձեռնության աշխարհայացքային դիրքորոշում: Մենք հիմնվում ենք այն սահմանադրական ելակետի վրա, որ Հայաստանում իշխանությունը պատկանում է ժողովրդին: Մենք ենք իշխանության կրողը՝ սուվերենը և որոշում կայացնողները: Չժխտելով Նախաձեռնության նպատակների իրականացման համար քաղաքական ուժերի հետ համագործակցության հնարավորությունը՝ հայտարարում ենք, որ վարչական լծակներ ձեռք բերելու համար մղվող քաղաքական-կուսակցական պայքարը դուրս է Նախաձեռնության նպատակների և խնդիրների տիրույթից.
4. **Իրավունքի գերակայության սկզբունքը՝** որպես իրավական մեխանիզմ հակաիրավական և անարդարացի օրենքների դեմ և դրանցից բխող հետևանքների դեմ պայքարելու համար: Պետական կառավարման տարբեր ոլորտներում վարչական լծակներ ունեցող անձիք ընդունում են իրավական ակտեր, որոնք միտված են նրանց անձնական բիզնեսը ծաղկեցնելուն և հակասում են պետության և ժողովրդի ազգային շահերին, յուրացնում են հանրային ունեցվածքը: Այդօրինակ օրենքներն օրինականացնում են Հայաստանում առկա համակարգային կոռուպցիան և մարդու շահագործումը: Իրավունքի գերակայության իմաստով այսօրինակ օրենքներն անընդունելի են և չեն ճանաչվում Նախաձեռնության կողմից.
5. Ներկայացուցչական ժողովրդավարության սկզբունքների ձախողման պարագայում, **անմիջական**

www.teghut.am, save@teghut.am

 Փրկենք Թեղուտը – Save Teghut (group)

Ժողովրդավարության սահմանադրական սկզբունքի կիրառումը քաղաքացիական իրավունքների և հանրային սեփականության պաշտպանության համար.

6. **Բնական պաշարների ողջամիտ օգտագործումը և այլընտրանքային տնտեսական ճյուղերի զարգացումը՝** որպես երկրի տնտեսական զարգացման, սոցիալական արդարության և բարեկեցիկ հասարակության հիմնարար նախադրյալ: Հանրային ունեցվածքը և երկրի բնական պաշարները հանդիսանում են ժողովրդի սեփականությունը, որոնցից ստացվող եկամուտները պետք է հանրության միջև բաշխվեն արդարացիորեն:

Մենք անհերքելի ենք համարում, որ գիտակից քաղաքացիական հասարակության, ամուր և իրական ժողովրդավարության կերտումը Հայաստանի պահպանման համար կենսական անհրաժեշտություն է: Ուստի «Թեղուտի պաշտպանության» քաղաքացիական նախաձեռնությունը, համախմբում է **ազատ և գիտակից մարդկանց Հայաստանում, Մփյուռքում և ամբողջ աշխարհում**, ովքեր հավատում և պայքարում են հանուն մարդու առողջ և արժանապատիվ կյանքի:

Նախաձեռնությունը հորդորում է Հայաստանում, Արցախում, Մփյուռքում ապրող երիտասարդներին անհապաղ և անմիջականորեն ներգրավվել Հայաստանում ընթացող սոցիալական արդարության վերականգնման, բնապահպանության և արժանապատիվ կյանքի պայքարին:

Թեղուտի պաշտպանության քաղաքացիական նախաձեռնությունն առաջնորդվում է այն գիտակցությամբ, որ Մանիֆեստում արտացոլված արժեքներն ու սկզբունքները կենսագործելը մեզ համար ոչ թե պայքար է, այլ ամենօրյա ապրելակերպ: Մենք հանձնառություն ենք ստանձնում համառորեն և մինչև վերջ հետամուտ լինելու մեր հանրային շահերի և իրավունքների պաշտպանությանը և կոչ ենք անում մեր սկզբունքները և աշխարհայացքը կիսող բոլոր կազմակերպություններին, նախաձեռնություններին և քաղաքացիներին համերաշխություն հայտնել Մանիֆեստով հռչակվող մոտեցումներին: